

編號 1 號

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；拘禮个海風，驚生份个吹一陣又恬一陣，出海口个海浪，慢板慢板在該激啊激仔¹。無人出入个魚市場裡肚，斯單淨留等，幾蕊²孤栖个電火，還過，幾臺摧啊摧仔³个抽風機。

魚市場外背闊闊个停車場這片，犖花犖花仔⁴停等幾臺自用車，還毋想睡个駛車人，有人帶等罐頭來供流浪狗、也有人帶等釣槓來湊月光釣魚仔。魚市場該片遠遠个停車場脣頭，幾下個越夜越有元氣个後生人，載等掛有大喇叭个音響，摺車後斗掇向天、三臺車仔比比企，在該咚滋咚滋⁵尋月光共下跳舞。

正手片个音樂聲撓⁶到佢个腳底痠痠⁷，毋過，左手片騎等過个兩臺奧多拜，錫著佢个目光。佢跔等佢兜个身影，行上兩百八十

公尺長个笨鯊橋，想去看，掛等頭燈个兩隻網魚人，係愛網麼个魚仔？月光乜勾頭出來咧，一浪一浪个水紋，在月光下看到清清楚楚，一張魚網、兩個網魚人，落網、收網，撈起來个係一網个月光。雖然，連魚屎都無，毋過，佢兜還係有講有笑，佢想，佢兜怕係為著愛打嘴鼓來个，網魚仔，單淨係兩同年想在月光下共下奈个理由定定。

橋下个河壩水，乜認同佢个想法，「係啊，係啊！」緊應緊大聲，佢緊聽緊生趣。毋過，摺佢看真來，該「係啊，係啊！」个聲哨，怕係河壩水分海浪打轉來，抑係海浪激上河壩水个聲啊！

毋多知仔，就分佢行過笨鯊橋咧。橋這片，日時頭分人箭到轂轂个自行車，這下通棚一列一列企好、企正，在月光下恬靜。光華華个路燈下，無人上下咧，斯單淨一隻揸等螺殼个毛蟹，對白沙堆勾頭出來又囡倒轉去，對路脣趕過來又趕倒轉去，自家在月光下搞園人尋。佢企在路脣，看毛蟹、看流流流流个河壩水，在共樣个月光下，當像分佢看著，頭擺，該一大陣笨鯊入港時，客家打漁人佢兜面町⁸个笑容。

¹ 激啊激仔：音 gieb` a<sup>+</sup> gieb` er；液體來回晃動貌。

² 幾蕊：音 gi` lui；幾盞。

³ 摧啊摧欵：音 kog` a<sup>+</sup> kog` er；此為形容機器轉動的聲音和狀態。

⁴ 犖花犖花仔：音 lo` fa` lo` fa` er；稀疏間雜著其他花色的樣子。

⁵ 咚滋咚滋：音 dung` zii` dung` zii；形容電子音樂的節奏聲。

⁶ 撓：音 neu；搔、抓。

⁷ 痠痠：音 hoi hoi；癢癢的感覺。

⁸ 面町：音 mien` nen；臉上。